

# Dhialèk Jawa Wétanan

**Carabasa Jawa Wétanan** (Ind: dialek bahasa Jawa Timur) utawa **basa Jawa Wétanan** (iku salah siji saka telung carabasa gedhé basa Jawa kang dicaturaké ing mèh saindengé tlatah Jawa Wétan lan sawenèh tlatah Jawa Tengah brang lor-wétan. Carabasa Jawa Wétanan brang lor watesé tekan tlatah Jawa Tengah, déné brang kidul ora nyrambahi kabèh tlatah kidul Jawa Wétan. Paling kulon, carabasa Jawa Wétanan dicaturaké tekan Pathi lan Grobogan. Paling wétan, carabasa Jawa Wétanan dicaturaké tekan Banyuwangi, kang sapérangané nganggo basa Using. Carabasa iki dumadi saka pirang-pirang bageyan carabasa kaya: Blora, Pathi, Bojanegara, Gresik, Surabaya, Malang, lsp.

Carabasa Jawa Wétanan yèn dibandhingna karo carabasa baku (carabasa Jawa Tengahan), bédané katon ing babagan swarajati (Ind: fonetik) lan paramasastra (Ind: tatabahasa).

<b>Isi</b>
<b>Swarajati</b>
<b>Paramasastra</b>
Morfologi
Sintaksis
<b>Cathetan sikil</b>
<b>Réferènsi</b>

## Swarajati

Ing sawenèh wewengkon, kaya Gresik, Pasuruan, Surabaya, Sidaharja, fonem swara carabasa Jawa Wétanan kang ditemokaké ana woluh: /a/, /i/, /u/, /e/, /ə/, /ɛ/, /o/, lan /ɔ/.<sup>[1]</sup> Iki béda saka gunggung fonem swara kang ditemokaké ing carabasa baku kang cacahé enem<sup>[2]</sup>: /a/, /i/, /u/, /e/, /ə/, lan /o/, déné /ɛ/ lan /ɔ/ dianggep alofon. Pasangan minimal kanggo nuduhaké yèn /ɛ/ lan /ɔ/ iku fonem contoné tembung /ɔmbɔ/ ('jembar') lan /amba/ ('ngambah'), uga tembung /kabe/ ('kulawarga berencana') lan /kabɛ/ ('kabèh').<sup>[1]</sup>

Ing carabasa Jawa Wétanan, ana korèspndhènsi antarané uni [ɛh] lan [ɔh] karo [ɪh] lan [ʊh] ing carabasa Jawa Tengahan. Contoné kaya ing Pasuruan karo Bojanegara, tembung /mulɛh/ korèspndhènsi lan tembung *mulih* /mulɪh/ ing carabasa Jawa Tengahan, déné tembung /abɔh/ korèspndhènsi lan tembung *abuh* /abʊh/ ing carabasa Jawa Tengahan.<sup>[1]</sup>

Fonem /w/ ing awal tembung iku ora muncul ing carabasa Jawa Wétanan. Contoné, tembung Jawa Tengahan *wétan*, *weruh*, karo *wutuh* dadi /etan/, /ɐɾʊ(h)/ utawa /ɐɾɔ(h)/, karo /utʊ(h)/.<sup>[1]</sup>

## Paramasastra

Ing babagan gramatika, carabasa Jawa Wétanan duwé ciri ing tataran morfologi lan sintaksis.

## Morfologi

Ana limang ciri morfologi kang mbédakaké carabasa Jawa Wétanan saka Jawa Tengahan, ya iku:

- panambang *-(n)em* kanggo nandhani persona kelo<sup>[1]</sup> kang ditemokaké ing wewengkon Blora, Pathi, lan Rembang;
- panambang *-lèh* kanggo nandhani imperatif<sup>[1]</sup> kang ditemokaké ing wewengkon Blora, Pathi, lan Rembang;
- ater-ater *tik-* kanggo nandhani tembung kriya pasif<sup>[1]</sup>; *tik* uga kanggo tembung ancer-ancer<sup>[1]</sup>;
- dwipurwa kang tegesé 'nganggo'<sup>[1]</sup>;
- ater-ater *sun-* utawa *sang-* kanggo nandhani pronomina posèsif ing sadurungé tembung aran<sup>[1]</sup>; *sang-* dienggo ing wewengkon Gresik.

Ciri morfologi	Jawa Wétanan	Jawa Tengahan
panambang <i>-(n)em</i>	jambunem kalungem	jambumu kalungmu
panambang <i>-lèh</i>	sigarlèh panganlèh	sigara pangana
ater-ater <i>tik-</i>	tikpangan tiksapu	dipangan disapu
dwipurwa 'nganggo'	gegelung	gelungan
ater-ater <i>sun-</i> ater-ater <i>sang-</i>	sunroti sangroti	rotiku rotiku

## Sintaksis

Ciri sintaksis kang mbédakaké carabasa Jawa Wétanan saka Jawa Tengahan katon ing struktur ukara pasif mawa pelaku persona I lan II. Nèk strukturé ing carabasa baku *tak-V* utawa *kok-V*, ing carabasa Jawa Wétanan strukturé dadi *di-V (karo) awakku* utawa *di-V (karo) awakmu*<sup>[1]</sup>.

Ciri sintaksis	Jawa Wétanan	Jawa Tengahan
<i>di-V (karo) awakku</i>	Wit gedhang tikpéku karo awakku. Wit gedhang tikpéku awakku.	Wit gedhang takpikul.
<i>di-V (karo) awakmu</i>	Wit gedhang tikpéku karo awakmu. Wit gedhang tikpéku awakmu.	Wit gedhang kokpikul.

## Cathetan sikil

1. Wedhawati 2006, k. 22.
2. Wedhawati 2006, k. 65.

## Réferènsi

- Wedhawati (2006). *Tata Bahasa Jawa Mutakhir* (<http://books.google.com/books?id=GgUSxxXw0JIC>). Kanisius. ISBN 978-979-21-1037-1.

## Basa Jawa

<b><u>Paramasastra</u></b>	<u>Fonologi</u> · <u>Morfologi</u> · <u>Sintaksis</u>		
<b><u>Sajarah</u></b>	<u>Jawa Kuna</u> · <u>Jawa Tengahan</u> · <u>Jawa Anyar</u>		
<b><u>Aksara</u></b>	<u>Carakan</u> · <u>Pégon</u> · <u>Latin</u>		
<b><u>Warna-warna</u></b>	<u>Jawa Baku</u>		
		<u>Jawa Wétanan</u>	<u>Surabaya</u> · <u>Malang</u>
	<u>Dhialèk</u>	<u>Jawa Tengahan</u>	<u>Semarangan</u> · <u>Mataraman</u> ( <u>Ngayogyakarta-Surakarta</u> )
		<u>Jawa Kulonan</u>	<u>Sérang</u> · <u>Cerbon-Dermayu</u> · <u>Tegal</u> · <u>Banyumasan</u>
	<u>Walikan</u>	<u>Malangan</u> · <u>Ngayogyakarta</u> · <u>Semarangan</u>	
<b><u>Unggah-ungguh</u></b>	<u>Tembung</u>	<u>Baku</u>	<u>Ngoko</u> (lan <u>Krama ngoko</u> ) · <u>Krama</u> · <u>Krama inggil</u> (lan <u>Krama andhap</u> )
		<u>Ora baku</u>	<u>Krama enggon-enggonan</u> · <u>Krama désa</u> · <u>Krama madya</u>
	<u>Basa</u>	<u>Modhèren</u>	<u>Ngoko</u> <u>Ngoko lugu</u> · <u>Ngoko alus</u> <u>Krama</u> <u>Krama lugu</u> · <u>Krama alus</u>
		<u>Kajawèn</u>	<u>Ngoko</u> <u>Ngoko lugu</u> · <u>Ngoko antya-basa</u> · <u>Ngoko basa-antya</u>
			<u>Madya</u> <u>Madya ngoko</u> · <u>Madyantara</u> · <u>Madya krama</u> <u>Krama</u> <u>Wrédha krama</u> · <u>Kramantara</u> · <u>Mudha krama</u>
		<u>Bagongan</u>	
	<b><u>Liyané</u></b>	<u>Angka</u> · <u>Geguritan</u> · <u>Jeneng</u> · <u>Sastra</u> · <u>Konggrès Basa Jawa</u>	

Dijupuk saka "[https://jv.wikipedia.org/w/index.php?title=Dhialèk\\_Jawa\\_Wétanan&oldid=1523776](https://jv.wikipedia.org/w/index.php?title=Dhialèk_Jawa_Wétanan&oldid=1523776)"

**Kaca iki pungkasan diowah nalika 03.55, 27 Juni 2020.**

Tèks iki cumepak kanthi Lisènsi Atribusi-DumSaèmper Creative Commons; paugeran tambahan bokmanawa uga lumaku. Wacaa Paugeran Panganggo kanggo rerincèné.